



RAMLI menunjukkan ikan baung ekor merah yang mati dalam tali air sawah Kampung Ganchong Hulu, Pekan dipercayai berpunca daripada pencemaran air.

Siasat kes ikan mati dalam tali air

Hm 5/10/2022 ms: 3

Pekan: Jabatan Perikanan Pahang sedang menyasat punca ribuan ikan dalam tali air di sawah Kampung Ganchong Tengah dan Kampung Ganchong Hulu, di sini, yang mati secara mengejut, minggu lalu.

Pengarahnya Abdullah Jaafar berkata, siasatan bertumpu untuk mengenal pasti punca kejadian berkenaan boleh berlaku.

“Kita sudah mengambil ikan yang mati untuk analisa di makmal bagi mengenal

pasti punca kematian, sama ada disebabkan pencemaran air atau faktor lain untuk mengetahui punca kematian ikan secara mengejut seperti didakwa penduduk.

“Selain pencemaran air, faktor cuaca juga boleh menyebabkan ikan mati dengan jumlah yang banyak secara serentak,” katanya.

Sementara itu, penduduk Ramli Bidin, 83, mendakwa pencemaran air dipercayai menjadi punca ratusan kilogram ikan dalam tali air di

sawah Kampung Ganchong Hulu, dekat sini, mati secara mengejut minggu lalu.

Di samping itu, menurutnya, ikan pelbagai spesies seperti baung ekor merah, lampam jawa, kerai, haruan, keli dan temperas mati sepanjang tali air yang membekalkan sumber air kepada lebih 150 hektar sawah yang diusahakan 83 pesawah tempatan.

Menurutnya, sebelum ini kejadian ikan mati dalam tali air sawah di kampung itu

pernah berlaku, namun tidak terlalu serius.

“Kejadian terbaharu yang berlaku ini seolah-olah membunuh semua ikan yang terdapat dalam tali air terbabit, ikan bersaiz kecil dan besar semua mati.

“Saya bagi pihak penduduk merayu kepada pihak berkaitan supaya dapat segera menyasat punca kejadian sehingga menyebabkan banyak ikan mati,” katanya ketika ditemui Harian Metro.